



საქართველოს მეცნიერებათა ეროვნული აკადემია

ქართული ენციკლოპედიის ი. აბაშიძის სახელობის მთავარი სამეცნიერო რედაქცია

ლორთქიფანიძე ივანე ნესტორის ძე

ლორთქიფანიძე ივანე ნესტორის ძე (1890, ქუთაისი, –1937, თბილისი), საზოგადო და პოლიტიკური მოღვაწე, ექიმი. დაამთავრა ქუთაისის ქართ. სათავადაზნაურო გიმნაზია (1909) და ხარკოვის უნ-ტის სამედ. ფაკ-ტი (1914). 1914-იდან ეწეოდა საექიმო-პრაქტ., საზ. და პოლიტ. მოღვაწეობას. 1915-იდან იყო ესერთა (სოციალისტ-რევოლუციონერთა) პარტიის თვალსაჩინო წარმომადგენელი, პარტიის ცენტრ. კომიტეტისა და საქართვე. ეროვნ. საბჭოს წევრი (1917–18). ეროვნ. საბჭოს 1918 წ. 26 მაისის საგანგებო ყრილობაზე ხელი მოაწერა საქართვე. სახელმწ. დამოუკიდებლობის აღდგენის აქტს; საქართვე. დემოკრ. რესპუბლიკის მთავრობის წევრი – გზათა მიმოსვლის მინისტრი (1918–21). ბოლშევიკური რუსეთის მიერ საქართვე. ოკუპაციისა და ანექსიის (1921 თებ.-მარტი) შემდეგ, ლ. აქტიურად მონაწილეობდა საქართვე. ეროვნ.-განმათ. მოძრაობაში – იყო საქართვე. მემარჯვენე ესერთა ორგანიზაციის იატაკქვეშა ცენტრ. კომიტეტის თავ-რის მოადგილე, საქართვე. დამოუკიდებლობის კომიტეტის (იგივე „პარიტეტული კომიტეტი“) წევრი (1922–23). 1923 დეკ. დააპატიმრა საქ. სსრ „საგანგებო კომისიამ“ (ე. წ. „ჩეკა“). განთავისუფლების შემდეგ (1925-იდან) ეწეოდა საექიმო-პრაქტ. საქმიანობას. საბჭოთა რეპრესიების მსხვერპლი.

ლიტ.: საქმე საქართველოს ანტისაბჭოთა პარტიების პარიტეტული კომიტეტის შესახებ (საბრალდებო დასკვნა), თბ., 1994 (პირველად გამოიცა 1925 წ.).

ლ. ურუშაძე
